

6 November 2014

Dagsê Almal

Vol dankbaarheid is ek weereens vanoggend teenoor ons Skepper asook een en elkeen se bydrae wat die afgelope twee weke ingekom het om my uit die koskrisis te haal. Ons kombuiskas is weer ruim gevul en kan Petro vir elkeen versorgd huis toe stuur hierdie naweek. Die eina toe Jacky voor my staan en sê dat daar vanoggend tuis nie genoeg pap was nie is baie moeilik om te verwerk. Haar twee dogtertjies is albei in die Via Nova spesiale skool en ry met die bus elke dag. Weereens dankie aan almal.

Ons het almal die dag by GK Rietvallei BAIE geniet en ons kontantblik het amper R7000 in gehad asook nog kussing-en groente bestellings vir R2500.

Ons sluit 12 Desember 2014 en maak eers weer 19 Januarie 2015 oop wat beteken dat die gesinne vir 5 weke versorging tov kos nodig gaan hê. Ek sal dit opreg waardeer indien ons solank kan begin om die kospakkies voor te berei. Ek sal volgende week 'n naamlys beskikbaar maak van die gesinne en hul behoeftes. Indien daar gemeentes en of wyke is wat graag een gesin wil versorg sal dit my taak baie vergemaklik. Laat weet maar asseblief so gou moontlik.

Ek en Petro beplan ons jaarafsluiting vir die 11de Desember. Soos voorheen is dit dan ons almal hier se "verjaardag" en deel ons geskenke uit. Ek wag dat elkeen vir my so 'n klein "wenslysie" gee en sal dit dan volgende week publiseer. Ons sal ons eie ete kan versorg met die vleis wat ons van Woollies af kry en groente wat ons self verwerk.

Ek herhaal die stukkie rondom ons daaglikse brood voorsiening weer aangesien dit uiteraard nooit ophou nie. Klere kan mens was en weer dra maar kos kan ons net een maal inneem:

"... KOS nodig soos vars-en sojavleis, geblikte vleis en vis(naweke maak hul self kos en baie min van hulle het krag of stofies), bakedbeans, koffie, tee(rooibos en gewoon), melk(boks of poeier want meeste van hulle het nie yskaste nie), margarien(ons eet gemiddeld 3-4 brode p/dag)(hulle maak ook broodjies vir die kinders vir skool), broodsmere soos Bovril, grondboontjiebotter, stroop en konfyt, **SUIKER**, kitsmieliemeel(om krag te spaar), makaronie en spaghetti, sout,

peper en speserye, soppakkies, aanmaak koeldrank, kookolie en eiers. Luukshede soos kaas, kondensmelk, vlapoeier, koekmeel vir vetkoek, gis en lekkernye vir die kinders sal ook baie welkom wees maar is nie noodsaaklik nie. Ek en Petro poog om daaglik 'n gebalanseerde ete voor te berei met 'n proteïen, stysel en vitamien(vars groente) in. Ons kan tans net 2 dae per week vleis gebruik aangesien ons baie min kry en die ander 2 dae gebruik ons vis en eier as proteïen. Die kospakkie vir die huis(3dae) wat hulle self moet kos gaan maak sluit gewoonlik brood, 1 blikkie vis, 1 blikkie vleis of soja, rys of pasta, vars groente uit ons projek, kookolie, melkpoeier en margarien indien beskikbaar, tee of koffie, suiker en soppoeier. Persoonlik wonder ek hoe hulle dit oorleef maar hulle aanvaar elke dingetjie met groot blymoedigheid en so stap elkeen met sy "Checkers" sakkie huistoe vir die naweek. Ons poog om soms gaar kos saam te gee vir die naweke maar het nie altyd beskikbaar nie. Dit pluk aan my hart wanneer hulle so begin groet en huistoe gaan met die karige bietjie wat hul saamneem.

Gesien in die lig van bogenoemde wil ek graag vir al die gemeentes vra dat indien elke lidmaat elke Sondag net EEN blikkie of pakkie(sop of soja) kan saambring om af te dra vir die swaarkrymense sal ons nooit weer bekommerd hoef te wees **SOOS VANDAG** oor waar kom more en die dae daarna se kos vandaan nie. Indien elke gemeente 'n krat of koskas of boks in hul portaal kan plaas gemerk Eljada Huis Kosprojek is ek bereid om Maandae die rondte te doen en dit gaan afhaal. BAIE DANKIE BY VOORBAAT" Eljada Huis groete. Annatjie.

Bankbesonderhede

Eljada Huis, Standard Bank, Montana,
Marketlink spaar, 044396058,
Bankkode 051001

NOODROEP VANUIT DIE ELJADA HUIS!!!!

- **KOS – BAIE GROOT NOOD**
- Toiletware – noodsaaklik om skoon te bly
- Plastiese sakke – "Checkers", ander groot en klein, bakke en bottles. Tafeldoeke.
- Melkkratte en ander kratte vir die groente projek. Baie groot en kleiner skottels, skerp messe(groot en klein) en skillertjies.
- Appelbokse – handig want hulle maak toe
- Inloopyskas en gewone yskaste
- Kombuiskaste – veral staal en tafels
- Rekenaars, ou selfone en TV's asb